



Voluntaris s'ingaschan per cuntrada e natüra

Mürs morts vegnan refats sur il cumün dad Ardez



Il piazzal da lavur per refar mürs morts es sur il cumün d'Ardez in vicinanza da Chanoua.

fotografia: Felix Riegger

Desch personas han passantà ad Ardez ün'eivna da vacanzas cun refar ün mür mort. L'acziun da la «Stiftung Umwelteinsatz Schweiz» SUS e la Pro Natura es organisada cul sustegn da la fundaziun Pro Terra Engiadina.

Tanter il cumün d'Ardez e Chanoua han refat d'incuort desch homens e duonnas ill'età da 30 a 65 ons ün mür mort. Els sun gnüts instruits da Felix Riegger. Il giardinier per cuntradas independent da Basilea Champogna s'ha specialisà avant vainch ons per mürs morts: «Quists mürs faivan ils paurs sainza molta, cul material chi d'eira avantman in surabundanza, cun crappa», declera Riegger. El ha il sustegn da seis assistent Flavio Bucher. I sun incumbenzats da la «Stiftung Umwelteinsatz Schweiz» (SUS). Quella s'ingascha daspö l'on 1976 pel mantegniment e la chüra da la cuntrada.

Insembel culla Pro Natura organise-

scha la SUS minch'on var 23 eivnas da quistas vacanzas particularas. Sco l'eivna passada ad Ardez e dals 24 als 30 gün i'ls contuorns da Bivio cul manader Michael Gastelli imprendan voluntaris da specialists co chi's fa quists mürs morts. Per organisar l'eivna in Engiadina Bassa hana gnü il sustegn da la fundaziun Pro Terra Engiadina e per l'eivna sur Bivio quel da rapreschantants dal Parc Ela.

«Da tuottas sorts motivaziuns»

Sco cha'l manader da l'eivna ad Ardez Felix Riegger disch, han ils partecipants tuot differentas motivaziuns per far da quistas sorts vacanzas: «Ils üns fan quai per pudair fabricar lura svessa da quists mürs in lur üerts, oters vöglan esser activs in lur vacanzas e prestar üna lavur ütila ed amo oters giordan simpelmaing la cumpagnia.» Ad Ardez sun stats activs ün hom chi lavura i'l sector da l'ambiant, üna magistra e mamma da Gossau, duos architects oriunds tudais-chs, ed ün impressari independent vallesan chi less as perfecziunar ed im-
prender a far mürs morts.

«Pro quistas eivnas esa uschè chi la-

vuran in lündeschdi e mardi, in marcurdi hana liber e pon scuvrir la regiun, in gövgia e venderdi suna darcheu activs sül piazzal da fabrica.» Sia aigna motivaziun es la fascinaziun ch'el ha per quista tecnica veglischma da far mürs chi's chatta in tuot ils territoris muntagnards. Perquai piglia Felix Riegger eir regularmaing part ad inscuters internaziunals in pajais da las Alps cul tema mürs morts. «In quistas occasiuns barrataina experienzas e preschantain als collegas da nossas lavuors.»

«Mürs dan structura a la cuntrada»

Per pussibilitar da cultivar chomps ed avair prada main stipa sun gnüdas terrassadas illas regiuns muntagnardas sco l'Engiadina Bassa grondas parts dal terrain agricul. «Quists mürs morts chi s'ha fat per avair terrassas sun elemaints da la cuntrada agricula e tilla dan eir

structura», declera il giardinier per cuntradas Riegger. «Il prüm hana rodlà giò la crappa plü gronda per avair la basa dals mürs morts, lura miss lasura craps plü pitschens e plü fins e lura darcheu da quels plü gronds per stabilir il mür.»

Cun l'ir dals ons dvaintan ils mürs morts però istess instabils. «E nus tils refain avant chi croudin in muschna.» Cha'ls mürs hajan però eir üna valur ecologica, agiundscha'l: «Els sun eir il dachasa ed il zop da bieras bes-chas. Perquai ha eir la Pro Natura interess cha'ls mürs gnian mantgnüts.» (anr/fa)



Cuors da far mürs morts in Samignun

L'on passà han refat voluntaris d'ürant ün'eivna da vacanzas da la «Stiftung Umwelteinsatz Schweiz» (SUS) e la Pro Natura eir in Samignun üna dunzaina da meters mürr mort illa costa tanter la fracziun Laret e la via chantunala. Andri Arquint, silvicultur da revier e manader dal servezzan tecnic da Samignun, vaiva proponü il lö da lavur: «I's tratta d'ün mürr cun üna lunghezza da var tschient meters», declera'l, «perquai es il cumün cuntaint ch'el ha eir ingon d'ürant trais eivnas, fin als 22 gün, glieud chi cuntinescha a refar il mürr.» Quista jada as tratta dad ün-desch homens chi praistan servezzan civil ed ün manader da la SUS. Els refaran quist on circa 70 meters dal mürr mort suot Laret.

In gövgia passada han paurs ed otras persunas interessadas gnü la pussibilità da visitar ün cuors per imprendere co chi's fa mürs morts. Il cuors in Samignun es gnü finanzià da la Pro Terra Engiadina e sustgnü dal cumün da Samignun.

(anr/fa)